

CUSSEGL GROND

Sessiun da zercladur 2023

Incumbensa Loi concernent la publicaziun da las averturas da las offertas e communicaziun dals criteris d'agiudicaziun tar incumbensas dal chantun

Il chantun Grischun surdat mintga onn incumbensas en la valor da plirs tschient milliuns francs. Per l'economia da construcziun grischuna e per ses furniturs directs èn questas incumbensas da fitg gronda impurtanza.

Las incumbensas vegnan publicitadas sin www.simap.ch. Fin ussa vegnivan las averturas da las offertas publicitadas mintgamai sin www.submission.gr.ch e pudevan uschia vegnir consultadas da mintgin, cunzunt er da las interpresas che na fan betg sezzas offertas. Dapi la participaziun dal chantun Grischun a la CIAP (Cunvegna interchantunala davart las acquisiziuns publicas) na vegn quai betg pli fatg. Quai, cumbain ch'il chantun Grischun ha empermess dapli trasparenza en las proceduras da surdada cun sia participaziun a la CIAP.

Questa trasparenza mancanta è in grond problem per las interpresas che na fan betg sezzas offertas. Ellas n'han nagina pussaivladad da s'infurmar da vart uffiziala, tge offertas ch'èn vegnidas inoltradas da tge interpresas. In furnitur da glera u da betun, in furnitur d'atschal, in montader da puntanadas, in interpredider da transport ed ulteriurs manaschis da furniziun che survegnan incumbensas sco subinterpresas, pon mo pli far in'offerta sin dumonda directa d'in offerent direct ubain far in'offerta spontana a tut ils offerents directs che vegnan en dumonda.

Las lavurs vegnan surdadas tenor novs criteris. Ils detagls da quests criteris restan intransparents per ils offerents. Quai è en quest senn deplorabel, perquai ch'ils offerents pudessan s'orientar a quests criteris tar publicaziuns futuras, per cuntanscher uschia spezialmain in effect en il sector da la persistenza e da l'ecologia.

La concepziun transparenta e plausibla dals pass da la procedura cun la publicaziun da las averturas da las offertas e cun la communicaziun dals criteris d'agiudicaziun en connex cun surdadas da lavurs èn da gronda impurtanza. Quai stgaffescha confidenza ed è da gronda impurtanza existenziala per tut ils offerents.

Las sutsegnadras ed ils sutsegnaders incumbenseschan la Regenza da concepir las disposiziuns executivas chantunalas tar la CIAP uschia che:

1. tut las averturas da las offertas ston vegnir publicitadas uffizialmain;
2. ils criteris d'agiudicaziun vegnan preschentads en moda transparenta e plausibla a tut las interpresas che fan sezzas offertas;
3. i vegnia communitgà generalmain en moda transparenta e plausibla suenter l'entrada da las offertas e tar la surdada d'incumbensas.

Claustra, ils 15 da zercladur 2023

Loi, Rüegg, Della Cà, Adank, Altmann, Bavier, Berther, Berweger, Brandenburger, Bundi, Censi, Claus, Cola Casaulta, Cortesi, Cramer, Derungs, Furger, Gansner, Grass, Hartmann, Hefti, Heini, Hohl, Holzinger-Loretz, Hug, Jochum, Koch, Kocher, Lamprecht, Luzio, Menghini-Inauen, Michael Beni (Donat), Michael (Castasegna), Mittner, Morf, Natter, Rauch, Righetti, Roffler, Saratz Cazin, Sax, Schutz, Sgier, Stiffler, Stocker, Thür-Suter, von Tscharn, Wieland